

## CAPUT XXXVI.

## DE FUNDATIONIBUS ET DOTATIONIBUS CELLARUM.

Sunt in hac Carthusia cellae per alphabeti ordinem distinctae. Itaque earum fundationes et dotationes eodem ordine commemorabo.

*Cella †.*

Prima in ordine est Cella domini prioris, signo Crucis, quod alphabeto praepositur, notata. Hanc anno 1499 construxit et liberaliter dotavit magister Franciscus de Busleiden, praepositus Leodiensis et instructor Philippi archiducis Austriae, postea ejusdem principis primus consiliarius et archiepiscopus Bisuntinus. Qui etiam aliam cellam extra Bruxellam in domo Gratiae fundavit <sup>1</sup>. Ejus epitaphium est ad cellam D. Prioris :

Sum Bisuntinus flamen Buslidius, alma  
Pacis opus, matris hostis, amorque ducum.  
Me Luxemburga terris, Hispania Parcis  
Addidit : ast claris facta decora viris.  
Cor Bisuntinis misi, liqui ossa Toleti.  
Flevere exanimem Rex pius et patria.

Item :

Ad mea Rex magnus lusit rudimenta Philippus :  
Composui Reges, digessi publica, pacis  
Et Regi et patriae suasor opusque fui.

*Cella A.*

Secunda cella est procuratoris, quam cum cohaerente ambitu fundavit et dotavit illustrissima domina Margarita ab Anglia, Caroli ducis bellicosi, quem Audacem dicunt, vidua, mulier multum religiosa.

<sup>1</sup> Vide *Mémoire historique et littéraire sur le collège des Trois-Langues à l'université de Louvain*, par M. le professeur F. Nève, p. 58 et 573.

*Cella B.*

Tertia cella est vicarii, quam fundavit ac dotavit generosa et nobilis domina Catharina de Ranzen, vidua Judoci Absoloens, generosi militis, quae obiit anno 1500 ultima augusti, et cum marito suo in choro est sepulta. Adamabant enim eum locum, qui ex eorum feudali curia in domum Dei erat conversus.

*Cella C.*

Sequentem cellam fundavit et dotavit clarissimus dominus Conradus de Sarto, Leodiensis, custos ecclesiae cathedralis S. Lamberti, abbas saecularis Namurcensis, praepositus ecclesiae Mechliniensis et ibidem consiliarius Magni Consilii. Obiit Lovanii anno 1502, die 6 februarii, et a capitulo S. Petri sepultus est in choro Carthusiae.

*Cella D.*

Quintae cellae fundatrix et dotatrix fuit generosa domicella Catharina de Oppendorp, vidua Joannis de Bullois, equitis. Quae etiam, ad cumulum meritorum suorum, fundavit Lovanii monasterium sanctae Clarae.

*Cella E.*

Sequentem cellam fundavit Catharina Pinnocxs pro anima sua et pro anima mariti sui, domicelli Liberti de Meldert, domini de Budingem et de Vreedelingen ac advocati de Raethoven. Obiit anno 1512, die 11 martii, plurium locorum larga benefactrix.

*Cella F.*

Cellam litera F. notatam cum suis attinentiis fundavit et liberaliter dotavit reverendissimus dominus Nicolaus Ruistre, episcopus Atrebatensis<sup>1</sup>. Qui in tantum addictus fuit patribus Carthusiensibus, ut cogitaret de fundatione novi monasterii. Sed communicatione desuper habita cum Joanne

<sup>1</sup> Vide supra p. 150.

Robbys, decano Mechliniensi, loco ejus fundavit in Universitate collegium Atrebatense.

*Cella G.*

Cella, quae prima ad meridiem sequitur, est constructa et dotata impensis honesti viri Gobelini Steegman, civis et mercatoris Antverpiensis.

*Cella H.*

Venerabilis dominus et magister Joannes Alardi ab Helmont, presbyter, qui fratribus saepe verbum exhortationis proposuit, eosque honestae suae conversationis exemplo plurimum aedificavit, obiit anno 1508, in die Crispini et Crispiniani martyrum. Hic moriturus legavit sustentationem unius monachi et dotationem cellae sequentis.

*Cellae I, K et L.*

Nondum sunt.

*Cella M.*

Fundata est a domino Leone Outers, ab Hondischota, praeposito ecclesiae divi Pauli in civitate Leodiensi, qui Carolo Viruli in regentia Lillii anno 1493 successit. Cujus anniversarium est die 6 junii.

*Cellae N et O.*

Sequentes duas cellas erexit, complevit et dotavit honestus vir magister Thomas de Zwanenburch, presbyter et canonicus ecclesiae in Gheertvliet, munificus hujus domus benefactor, qui obiit in Haga Comitum anno 1524, die 22 maii.

*Cella P.*

Cellam litera P. ab aliis distinctam dotavit domicella Aleidis Maritons, vidua civis Lovaniensis, mater magistri Ludovici Maritons, canonici S. Jacobi supra Biest.

*Cella Q.*

Est cella Mariae Magdalenae de Hamale, illustris et generosae dominae de Elderen et aliorum dominiorum, viduae Wilhelmi de Croy, marchionis de Arschot et Rotselaer, comitis de Beaumont, domini Cerviensis, etc. Quae inter multa pietatis opera duo Lovanii construxit monasteria, unum Coelestinorum, alterum Annunciationis beatae Mariae.

*Cella R.*

Cellam decimam octavam erexit et dotavit magister Adrianus de Helwygher, redituarius et consiliarius Philippi principis in districtu Lovaniensi, qui obiit anno 1551, 15 martii.

*Cella S.*

Cella quae sequitur est domini Simonis a Slusa, praepositi Ultrajectensis et Mechliniensis, medici et archiatri Philippi archiducis, qui obiit Mechliniae anno 1499, die 17 septembris.

*Cella T.*

Cella T. est Gualteri Gielis de Busco Ducis, mercatoris Brugensis, magni eleemosynarii, viri justus et timoratus. Qui anno 1497 moriens, praeter hujus cellae dotationem, pro inchoatione ecclesiae mille et quingentos florenos rhenenses legavit. Quae omnia Gisbertus Gielis, frater ejus, Lovanium veniens sanctissime et superabundanter implevit.

*Cella V.*

Cella sequens inchoata est ex legato 208 florenorum, quos assignavit

magister Gaspar de Kinschot, canonicus divi Petri et regens in paedagogio Falconis. Sed assignatio haec et inchoatio cellae multas sustinuit adversitates. Postmodum ea cella absoluta est a generoso et nobili domino Joanne de Bergis, qui pro dotatione et sustentatione inhabitantis donavit sex bunnaria et tria jurnalia terrae arabilis, contulit praeterea plusquam 500 florenos, qui in perficiendo ambitu, item in aedificatione coquinae et cubi- culi hospitem sunt impensi. Hujus ibidem epitaphium est :

Christe, crucis durae praedura mole gravatus,  
 Quam gessisti humeris, rex Deus alme, tuis;  
 Dum grege cum sancto occurrit Veronica matrum,  
 Et tibi morte tua nostra petita salus;  
 Da vitam incolumem per saecula multa Joanni,  
 Bergensis populi qui moderamen habet.  
 Proque loco exstructo hoc in coelis praemia redde,  
 Quum vita in terris longior esse nequit.

*Cella X.*

Est cella Joannis Overhof, civis Antverpiensis, quoad tempus aedifica- tionis omnium prima. Overhof enim volens de bonis suis in vita dispo- nere, dedit pro nova domo 600 florenos Andreae, mox anno 1492 pro fundatione et dotatione cellae primae adjecit florenos 400, et anno sequenti iterum 400 donavit.

*Cella Y.*

Eodem anno construebatur vicina cella, cui litera Y inscribitur, quae est cella primi fundatoris domini Gualteri Wattelet, praepositi Malbo- diensis.

*Cella Z.*

Pro structura cellae, quae secundum ordinem alphabeti postrema est. Nicolaus Dreyscher, Zelandus, sacerdos, vir honestae vitae, studiosus Lovaniensis, legavit centum florenos, quibus executores adjecerunt flore-

nos 65. Credo autem ad perfectionem hujus cellae pertinere, quod inter Anniversaria legitur Joannem de Hoya, Gandensem, sacrae theologiae professorem, dotasse cellam unam. Obiit annos natus octoginta septem anno 1518, die 17 novembris, inhumatus apud Conradum de Sarto.

## CAPUT XXXVII.

COMMEMORATIO ALIQUOT CARTHUSIANORUM DOMUS LOVANIENSIS.

*Henricus de Duvelandia.*

Obiit anno 1479, die 20 januarii apud Antverpiam, convisitator et prior domus S. Catharinae, specialis procurator et promotor hujus novellae plantationis; qui sua sollicitudine privilegia, dominorum consensum et multa bona impetravit.

*Joannes Schullinc, primus rector.*

Ex priore domus Delphensis constituitur primus rector domus Lovaniensis. Obiit 19 februarii.

Rectorem Carthusiani vocant eum, qui monasterio a capitulo generali aut a Majoris Carthusiae Priore praeficitur; quem plerumque anno evoluti conventus capitulariter eligit, et tum demum Prior ab eis vocatur.

*Joannes Delphus, primus prior.*

Obiit anno 1550, die 25 maii, postquam usque ad extremam senectutem in hac novella plantatione fidelissime laborasset.

*Joannes Vekenstyl, primus procurator.*

Vekenstyl, alias Blauwen-Steen, ex nomine domus paternae, patria